



Reykjavík, 18. maí 2021
SFS2021050167
209. fundur

Viðtakandi: Skóla- og frístundasvið

Sendandi: Helgi Grímsson, sviðstjóri skóla- og frístundasviðs

Efni: Tillaga sviðsstjóra skóla- og frístundasviðs um breytingu á stjórnun sértæku félagsmiðstöðvarinnar Hofs

Sviðsstjóri skóla- og frístundasviðs leggur til að skóla- og frístundaráð samþykki að frístundamiðstöðin Kringlumýri taki við rekstri sértæku félagsmiðstöðvarinnar Hofs frá frístundamiðstöðinni Tjörninni.

Greinargerð:

Hofið er sértæk félagsmiðstöð sem býður upp á frístundastarf fyrir fötluð börn og unglinga í 5. – 10. bekk í almennum grunnskólum og Brúarskóla sem stunda nám og/eða búa vestan Elliðaáa. Sértækum félagsmiðstöðvum var komið á fót árið 2007 vegna þarfa fatlaðra barna sem sóttu almenna grunnskólum á frístundapjónustu.

Á næsta skólaári 2021-2022 er áætlað að yfir 20 börn og unglingar muni sækja þjónustu í Hofinu sem stunda nám í 11 skólum víðsvegar úr borginni. Hofið er staðsett að Þorragötu 3, 101 Reykjavík sl. ár og hefur verið hluti af frístundamiðstöðinni Tjörninni. Þar sem flestir þátttakendur Hofsins sækja skóla og/eða búa í Laugardals-, Háaleitis- og Bústaðahverfi er lagt til að rekstur Hofsins færist frá frístundamiðstöðinni Tjörninni undir stjórn frístundamiðstöðvarinnar Kringlumýri.

Markmiðið með þessari breytingu er að auðvelda þátttakendum Hofsins að fara í þá félagsmiðstöð sem tilheyrir heimahverfi og/eða skóla viðkomandi þá daga sem opnun er fyrir viðkomandi aldur í stað þess að fara í Hofið. Þá daga sem ekki er boðið upp á almennt starf í viðkomandi félagsmiðstöð munu þátttakendur mæta í Hofið. Með þessu móti gefst börnunum tækifæri að rækta vinskap við skóla- og bekkjarfélaga í almennu starfi félagsmiðstöðva og starfið verður aldursskipt.

Ekki verður um þjónustuskerðingu að ræða en þó mun skipulag innra starfs breytast. Eftir sem áður verður boðið upp á þjónustu allan daginn á starfsdögum skólanna sem og í jóla-, páska- og sumarfríum.



Skýrt verður frá hausti hvernig dagskrá hvers barns mun líta út og hvaða daga viðkomandi barn verður annars vegar í húsnæði Hofsins og hins vegar í sinni almennu félagsmiðstöð með bekkjar- og skólafélögum sínum. Stuðningurinn verður eftir sem áður sá sami og verður skipulagður út frá þörfum hvers og eins og útlistaður sérstaklega í einstaklingsáætlunum líkt og áður.

Þessi breyting á stjórnun Hofs þ.e. frá frístundamiðstöðinni Tjörninni til frístundamiðstöðvarinnar Kringlumýri hefur verið unnin í samráði við stjórnendur frístundamiðstöðvarnar og Hofs. Ekki verður viðbótarkostnaður vegna þessarar breytingar.

Lög og stefnur sem frístundastarf SFS starfar eftir:

Í lögum um þjónustu við fatlað fólk með langvarandi stuðningsþarfir nr. 39/2018 kemur fram að sveitarfélög skuli bjóða upp á frístundaþjónustu fyrir börn í 5. – 10. bekk eftir að skóladegi lýkur og að þjónustuna skuli veita samhliða almennum frístundatilboðum ásamt því að hún skuli vera einstaklingsmiðuð.

Í samningi Sameinuðu þjóðanna um réttindi fatlaðs fólks sem fullgiltur var á Íslandi árið 2016 er skýrt kveðið á um fulla og virka þátttöku í samfélaginu án aðgreiningar. Einnig er það sérstaklega tekið fram í 30. grein samningsins að tryggja eigi fötluðum börnum aðgang, til jafns við önnur börn, til að taka þátt í tómstunda- og frístundastarfi.

Lög um samning Sameinuðu þjóðanna um réttindi barnsins nr. 19/2013 segja að stjórnvöld eigi að fjarlægja hindranir svo öll börn geti orðið sjálfstæð og tekið þátt í samfélaginu með virkum hætti og að öll börn skuli njóta allra réttinda án tillits til hver þau eru og hvort þau séu fötluð.

Í stefnu um frístundaþjónustu í Reykjavík til ársins 2025 er áhersla lögð á að draga úr félagslegri einangrun og stuðla þannig að aukinni og virkri þátttöku. Þar er sérstaklega kveðið á um að skapa eigi aðstæður til að koma betur til móts við unglinga í minnihlutahópum og hvetja til verkefna sem koma í veg fyrir félagslega einangrun þeirra. Jafnframt segir þar að frístundastarf skuli vera án aðgreiningar og að huga skuli að því að virkja til þátttöku einstaklinga sem þurfa sérstaka hvatningu og stuðning vegna félagslegra aðstæðna eða fötlunar og stuðla að jöfnum tækifærum fyrir alla.

Meginmarkmið Menntastefnu Reykjavíkur til ársins 2030 er að öll börn vaxi, dafni og uni sér saman í lýðræðislegu samfélagi sem einkennist af mannréttindum og virðingu fyrir fjölbreytileika mannlífs. Þar segir einnig að mikilvægt sé að starfsfólk eigi frumkvæði að samstarfi við foreldra og vinni að þróun og leiðum sem taka mið af ólíkum þörfum, menningu og reynslu barna og foreldra. Leggja á áherslu á fjölbreytt og þverfaglegt samstarf innan starfsstaða og milli starfsstaða í þágu barnanna.

Að endingu má nefna að í drögum að stefnu um félags- og tómstundastarf Mennta- menningarmálaráðuneytisins til 2030 kemur fram að skipulagt félags- og tómstundastarf eigi að mæta börnum þar sem þau eru stödd. Börn eigi að geta valið úr fjölbreyttum verkefnum í skipulögðu starfi sem taki mið af stöðu og áhuga þeirra hverju sinni. Starfið þurfi að vera



Reykjavíkurborg
Skóla- og frístundasvið

sveigjanlegt og geti aðlagast að síbreytilegu umhverfi og hugarefnum. Starfið eigi að vera skapandi, aðgengilegt, öruggt, skemmtilegt, alvarlegt og fullt af leik. Einnig er tekið sérstaklega fram að öll börn eigi að hafa aðgang og jöfn tækifæri til þátttöku.